

Mobbing C3*

En Theaterstéck mat der Klass - Gespillt als Schattentheater

Ziel bis dräi

D'Moule sinn bal esou eppes wéi d'Mënschen: si liewen op engem Planéit, dien "Alpha OuOu 2" heescht, a si hunn net vill Plaz dorop, well et schonns immens vill Moule gëtt.

Déi Plaz, déi hinnen nach bleift, hu si sech gutt opgedeelt: et gëtt ganz vill verschidde Moulen, an all hu se hiert eegent Land: zum Beispill liewen d'Moulasiaten a Moulasianien, an d'Moulafrikanisten a Moulafrikanesien, an a Moulamerikanien liewen d'Moulamerikanister. An esou weider an esou weider, et gëtt hirer nach immens vill.

Esou wéi bei de Mënschen och, hunn déi verschidde Moulen dacks Kaméidi mateneen an dann organiséieren se schlëmm Kricher, wou déi eng Moulen déi aner Moulen doutmaachen.

Ville Moule geet et iewer och ganz gutt. Si liewen a grousem Luxus, si hu vill Suen a kënnen wonnerbar Reese maachen. Aner Moule leiden Honger. Verschiddener stierwen esouguer, well se net genuch z'iessen hunn, oder well et bei hinne kee Waasser gëtt oder well et ze waarm oder ze kal bei hinnen ass. Gerecht ass dat normalerweis net, éischer Zoufall!

Déi eng Moulen hëllefene dienen anere Moulen och just dann, wa se selwer eppes dervun hunn. - Sollt iech dat elo verwonneren, dann

denkt einfach emol drun, wéi et bei eis Mënschen ass... gesitt der, genee d'selwecht. Oder?

Ee Moul wëllt méi staark si wéi dien aneren, ee wëllt méi dichteg si wéi dien aneren, ee wëllt diem anere soen, wat dien ze maachen an ze loossen huet, jidderee wëllt de Chef sinn an et besser hunn wéi déi aner.

Aarme Moulen, dat geet net gutt aus.

Dat ass de Roubert. De Roubert ass nach ee jonke Moul an hie geet nach an d'Schoul. Hien ass kee besonnesch gudde Schüler an och kee besonnesch schlechte Schüler; hie fällt net besonnesch op. Hien huet net besonnesch vill Frënn iewer och net besonnesch wéineg Frënn.

Hie geet net besonnesch gär an d'Schoul.

Elo frot dir iech bestëmmt, firwat hien net gär an d'Schoul geet.

Maja, bei de Moule gëtt et eppes wat ee "moulen" nennt. Dat heescht, de Roubert gëtt vu senge Kollegen an der Mouleschoul ... geschloen, gemoult: dir wësst bestëmmt, wat dat heescht.

Mee eent no diem aneren. Kommt, mir verzielen dem Roubert seng Geschicht ganz vu vir!

Wéi de Roubert an d'Mouleschoul komm ass, do hat hien eng Frëndin, d'Caroline. Hien huet d'Caroline vu klengem u kannt, well et war dem Roubert seng Nopesch.

-->

An der Schoul wollt dunn d'Roumina och dem Carouline seng Frëndin ginn. D'Carouline hat näischt dogéint, an och de Roubert hat näischt dergéint. Esou hu si am Ufank zu dräi gespillt.

-->

Bis d'Roumina seng 10 Joer kritt huet. Hatt huet eng grouss Gebuertsdaagsparty organiséiert an all d'Kanner aus der Schoul invitéiert. Et war e grousst Fest, bei diem sech jidderee gutt ameséiert huet, bei diem jidderee vill gespillt huet, bei diem vill gelaacht gouf. All d'Kanner hunn nach deeglaang dervu geschwat.

-->

Alleguer; bis op een. De Roubert huet net dervu geschwat, hien hat sech och net ameséiert an hien hat och net gespillt. Well de Roubert war dien eenzegen, dien d'Roumina net op seng Gebuertsdaagsparty agelueden hat. De Roubert war ganz alleng doheem bliwwen, an an dienen Deeg no der Party stung hien och ganz alleng am Schoulhaf, well hien net matspille konnt. Et si just e puer Kollege bei hie komm, fir hien ze froen, wat da mat him lass war. D'Carouline an d'Roumina waren net derbäi.

-->

Dunn ass de Roubert an de Moulballs-Veräin gaangen. Moulball ass e Spill, dat d'Moule scho ganz laang spillen, an dat se och ganz gär spillen. Moulball geet esou:

-->

De Roubert war net besonnesch gutt am Moulball, mee dat huet näischt gemaach, well den Toum war och kee gudde Spiller. Si

hunn sech also ëmmer ofgewiesselt. Eng kéier huet den Toum gespillt an eng Kéier huet de Roubert gespillt. All waren se zefridden, den Trainer, déi aner Spiller an hir Fans.

-->

Esou ass dat alles ganz gutt gaangen, bis eng Kéier. De Roubert war krank a konnt net op den Training kommen. Den Trainer hat dem Toum gesot, datt de Roubert e Samschdeg sollt um 4 Auer um Terrain sinn. Mee den Toum hat dem Roubert dat iewer net matgedeelt. Samschdes huet d'ganz Equipe op de Roubert gewaart, mee die koum net, well en et jo net wousst. Den Toum war iewer do, duerch Zoufall, wéi hie sot, also huet hien dunn am Roubert senger Plaz matgespillt.

-->

Dem Toum seng Equipe huet dëse wichtege Mätsch 1 zu 0 gewonnen, an den Toum hat zoufälleg de Moul geschoss!

-->

Deeglaang hunn d'Moulballisten iwwer dëse grouse Mätsch geschwat, a jiddereen huet dem Toum op d'Schëller geklappt. Vun elo un war hien an all Mätsch derbäi.

-->

Alleguer; bis op een. De Roubert huet net dervu geschwat, hien hat sech och net ameséiert an hien hat och net gespillt. Well de Roubert war dien eenzegen, dien net um Mätsch war, well hien näischt dervu wousst. Den Toum hat him net Bescheed gesot. De Roubert war ganz alleng doheem bliwwen, an an dienen Deeg no

dem Mätsch stung hien och ganz alleng am Schoulhaff, well hien net matspille konnt. Et si just nach zwee Kollege bei hie komm, fir hien ze froen, wat da mat him lass war. Den Toum war net derbäi.

-->

De Roubert wollt fir d'éischt mam Trainer schwätzen, mee dien hat net gutt Zäit, a wéi hien de Roubert gesinn huet, sot dee just, datt hien d'Equipe jo schéin am Stach gelooss hat, bei diem wichtege Mätsch.

-->

De Roubert huet vill gekrasch, an ugefaangen, um Computer Spiller ze maachen. Dat huet dem Roubert gutt gefall, an do war hien och wierklech gutt dran. Hien huet richteg Kampfmaschinen entwéckelt, déi all déi aner Monsteren an Ongeheier, déi en am Netz begéint huet, Meeschter gi sinn. Do war de Roubert mat sengem Held Araknoukräk mega gefaart vun allen aneren. Hie war dien Intelligentsten, die Stärksten, die Beschten!

-->

Do huet hien net gekrasch, am Netz war hien e Star. Mee an der Schoul ass et elo ëmmer méi dacks virkomm, datt dem Roubert seng Saache verschwonne sinn: säi Spëtzer war einfach net méi erëmzefannen, säi Rechebuch zerrappt an der Toilette, seng Schachtel am Kullang um Daach, säi Schoulsak am Stroossegruef. Kee wousst eppes dervun, kee wollt eppes dervu wëssen, all hu se gemaach, wéi wa se keng Ahnung hätten.

-->

De Schoulmeeschter an d'Joffer hu sech immens iwwer de Roubert opgereegt, well seng Saachen ëmmer gefeelt hunn. Hien huet vun elo un nach méi schlecht geléiert an hien huet nach méi gekrasch.

-->

Mee dës Kéier huet kee méi mat him geschwat. All hu se en alleng am Haf stoe gelooss a just iwwer die "Läppche" gelaacht.

-->

De Roubert wollt mat sengem Schoulmeeschter a mat senger Joffer schwätzen. Méi déi haten net vill Zäit, an déi hunn hie just vernannt, datt hien ni seng Saachen an der Rei hätt.

-->

Wéi de Roubert nees wollt mam Araknoukräk am Netz op d'Juegt goen, huet hien op eemol elauter Emaile kritt, op diene Fotoen a Filmer waren, déi de Roubert gewisen hunn, wéi hie gekrasch huet a ganz alleng am Haff stung. Hien huet SMSe kritt, wou "Heulsuse" an "Läppchen" dra stung an op Facebook war op eemol eng Säit am Netz, déi Heulsuse geheescht huet, an op dier een all déi Fotoe konnt kucken. Ganz séier hat déi Säit iwwer 50 Frënn, an all hu sech iwwer den "Heulsuse"-Roubert lëschtteg gemaach.

-->

De Roubert ass elo rose ginn, hie wollt säin Held, den Araknoukräk géint all déi Monsteren, déi hien esou beleidegt hunn, an de Krich schécken.

-->

Mee géint déi war den Araknoukräk machtlos, am Spill, am Netz war dat en Held, mee am richtege Liewen huet en näischt entdaacht. Egal wéi staark de Roubert den Araknoukräk gemaach huet, wéivill Power, wéivill Waffen a wéivill Energie hien em och ginn huet, e konnt näischt ausriichten.

-->

De Roubert huet dat gemierkt, an hien huet de Kapp nees hänke gelooss a gekrasch. Frënn hat hien elo keng méi, kee konnt him méi hëllefen. An hien huet sech net getraut fir bei seng Elteren ze goen, well déi hate schlecht Zäit, an déi hu souwisou gemengt, hien hätt besser ewech vun diem Computer ze bleiwen a sech op seng Schoul ze konzentréieren.

-->

De Roubert ass elo ganz alleng gewiescht. Hien huet den Araknoukräk geläscht, well hien huet em jo net konnen hëllefen. Dono huet hien dem Carouline ee Bréif geschriwwen, dono huet hien sengen Elteren e Bréif geschriwwen, an dunn ...

-->

Real: D'Kanner rappen d'Leinwand erof: Stopp! Elo geet et duer. Mir wëllen net, datt de Roubert sech eppes undeet. Emol ganz éierlech, et ass iewer gutt, datt esou krass Saachen nëmme bei de Moule gemaach ginn an net bei de Mënschen. Oder....

Also, wann dir eng Kéier mierkt, datt och bei eis Mënschen eou
eppes geschitt: NET EWECHKUCKEN!!!!!!!!!!!!

Musek: Ziel bis dräi!

Ziel bis dräi!

1,2,3 - Hei do am Haff, do stinn der zwee a kucke sech béis an d'Aen.

1,2,3 - Oh mei, wat soll dat ginn, wat kann ech dogéint man?

1,2,3 - Elo jäizen se haart, dien een hiewt schonns seng Hand.

1,2,3 - Dien aneren zitt de Kapp an ass schonns fortgerannt.

Ma dir zwee, da loosst dat sinn, dat huet dach guer kee Wäert.

1,2,3 - Dat alles bréngt dach näischt, wann een iech zwee fäert.

1,2,3 - Ma da loosst dat sinn!

1,2,3 - Well dat kann näischt ginn!

1,2,3 - Ziel bis dräi wanns du rose bass an dech net packe kanns.

1,2,3 - Wanns du spiers, dass du gliddeg bass, et bannen an dir kacht.

1,2,3 - Wanns du nëmmen nach schloe wëlls a keen anere Wee méi fënns:

1,2,3 - Ma da loosst dat sinn!

1,2,3 - Well dat kann näischt ginn!

Kanneraspillungen....

Ma dir zwee, da loosst dat sinn, dat huet dach guer kee Wäert.

1,2,3 - Dat alles bréngt dach näischt, wann een iech zwee fäert.

1,2,3 - Ma da loosst dat sinn!

1,2,3 - Well dat kann näischt ginn!

1,2,3 - Ziel bis dräi wanns du rose bass an dech net packe kanns.

1,2,3 - Wanns du spiers dass du gliddeg bass, et bannen an dir kacht.

1,2,3 - Wanns du nëmmen nach schloe wëlls a keen anere Wee méi fënns:

1,2,3 - Ma da loosst dat sinn!

1,2,3 - Well dat kann näischt ginn!

1,2,3 - Ziel bis dräi wanns du rose bass an dech net packe kanns.
1,2,3 - Wanns du spiers dass du gliddeg bass, et bannen an dir kacht.
1,2,3 - Wanns du nëmmen nach schloe wëlls a keen anere Wee méi fënns:

1,2,3 - Ma da loosst dat sinn!
1,2,3 - Well dat kann näischt ginn!